



Siaran Akhbar ini Diembargo hingga
1.05 tengah hari, Sabtu, 1 September 2018

(Sila semak selepas ucapan)

UCAPAN BAHASA MELAYU

UCAPAN PUAN RAHAYU MAHZAM, PENERUSI JAWATANKUASA BULAN BAHASA, AHLI MAJLIS BAHASA MELAYU SINGAPURA DAN ANGGOTA PARLIMEN GRC JURONG, DI MAJLIS PELANCARAN BULAN BAHASA 2018, SABTU, 1 SEPTEMBER, DI WISMA GEYLANG SERAI.

Tetamu terhormat, Encik Ong Ye Kung, Menteri Pendidikan

Profesor Madya Dr Muhammad Faishal Ibrahim, Pengerusi Majlis Bahasa Melayu Singapura

Encik Masagos Zulkifli, Menteri Sekitaran dan Sumber Air

Rakan sekerja Parlimen

Puan Tan Gee Keow, Setiausaha Tetap Kementerian Kebudayaan, Masyarakat dan Belia

Cik Yeoh Chee Yan, Pengerusi Lembaga Warisan Negara

Puan Chang Hwee Nee, Ketua Pegawai Eksekutif, Lembaga Warisan Negara

Para tetamu yang dihormati, tuan-tuan dan puan-puan sekalian



1. Selamat datang ke Majlis Pelancaran Bulan Bahasa 2018, dan terima kasih kerana sudi meluangkan masa anda untuk bersama kami di Wisma Geylang Serai pada hari ini.
2. Hari ini kita sama-sama meraikan satu pencapaian yang amat penting buat Majlis Bahasa Melayu Singapura. Tahun ini merupakan tahun ke-30 semenjak Bulan Bahasa pertama kali dianjurkan pada tahun 1988.
3. Ketika saya mula menerajui inisiatif Bulan Bahasa dua tahun yang lalu, saya sedar akan tanggungjawab saya untuk menyambung usaha baik mereka yang terdahulu. Setiap satu daripada mereka telah membuat sumbangan ketara dalam peningkatan dan pembangunan bahasa Melayu dan Bulan Bahasa di Singapura.
4. Encik Sidek Saniff merupakan peneraju Bulan Bahasa yang pertama ketika pembakuan bahasa Melayu dilaksanakan di Singapura. Usaha ini diteruskan oleh Encik Mohamad Maidin Packer Mohd pada tahun 90-an, dan sehingga hari ini, pelajar-pelajar bahasa Melayu menggunakan bahasa baku, termasuk sebutan baku di sekolah.
5. Bahasa dan sastera diberikan tumpuan ketika mendiang Encik Harun Ghani dan Encik Yatiman Yusof menerajui inisiatif ini. Bulan Bahasa terus berkembang dengan lebih rancak di bawah pimpinan Encik Hawazi Daipi, melalui inisiatif seperti Rakan Bahasa.



6. Untuk memastikan semua lapisan masyarakat di Singapura berpeluang untuk menghayati bahasa Melayu, Encik Masagos Zulkifli dan Encik Zaqy Mohamad telah mendapatkan sokongan daripada Jawatankuasa-jawatankuasa Eksekutif Kegiatan Melayu (MAECs) untuk mengadakan acara Bulan Bahasa di estet-estet perumahan. Encik Masagos dan Encik Zaqy juga telah menganjurkan sebuah edisi Bulan Bahasa yang sangat istimewa di Gardens by the Bay sempena sambutan SG50.
7. Maka itu, penting untuk kita, merakamkan sejarah dan perjalanan Bulan Bahasa sempena sambutan 30 tahun ini. Dengan kerja keras, Duta Bahasa, Encik Riz Sunawan, satu projek video istimewa telah dihasilkan. Video ini antara lain mengumpulkan mutiara-mutiara kata daripada perintis, pemimpin, Duta-duta Bahasa serta Rakan-rakan Bahasa, yang sudi berkongsi pengalaman dan cerita mereka. Versi pendek video ini dapat kita saksikan nanti.
8. Apabila saya meneruskan misi Bulan Bahasa, saya sedar, pendekatan untuk menggalakkan penggunaan Bahasa Ibunda harus mengikuti perkembangan masa. Ini penting, terutamanya, jika kita ingin menambat perhatian generasi muda yang boleh berdwibahasa, yang lebih cenderung menggunakan teknologi dan, yang mempunyai tahap kesedaran yang tinggi tentang isu-isu global. Cabaran kita adalah untuk memastikan bahasa Melayu kekal relevan dan menarik, mengikuti peredaran masa.
9. Penting untuk kita usahakan sesuatu yang bermakna untuk masyarakat Melayu kita dan mengadakan acara-acara yang dapat meninggalkan kesan. Pada masa



yang sama, kita juga perlu ada rancangan yang dapat melakarkan hala tuju usaha-usaha Bulan Bahasa seterusnya.

10. Tahun demi tahun kita terus adakan peningkatan. Misalnya, tahun ini, ada usaha untuk memperbaiki aktiviti-aktiviti Rakan Bahasa. Kita memperkenalkan Kembara Rakan Bahasa – kad aktiviti untuk Rakan-rakan Bahasa kita, dan mengadakan Pertandingan Newsmaker, di mana para pelajar menggunakan aplikasi untuk menyediakan laporan berita.
11. Lagu Bahasa Menjunjung Budaya, yang dikarang oleh mendiang Cikgu Muhammad Ariff Ahmad dan digubah oleh Cikgu Abdolah Lamat, adalah lagu tema Bulan Bahasa. Versi baru tahun ini, telah digubah oleh Duta Bahasa kita, Encik Megat Firdaus. Beliau juga telah menerbitkan sebuah video tarian untuk mengiringi lagu gubahannya.
12. Usaha ini adalah untuk menarik minat dan melibatkan penyertaan lebih ramai orang. Kami telah menjemput sekolah-sekolah dan rakan-rakan kerjasama untuk menyertai Cabaran Gerak Tari Bulan Bahasa dengan mengongsikan video tarian mereka di laman Facebook atau Instagram. Kami telah melihat banyak video-video penyertaan yang kreatif dan kami mengalu-alukan lebih penyertaan daripada orang ramai. Ada di antara para peserta Cabaran Gerak Tari Bulan Bahasa juga turut hadir bersama kami hari ini
13. Usaha meningkatkan rangkaian dan jangkauan Duta Bahasa juga terus dijalankan. Persembahan yang anda akan saksikan nanti merupakan bukti



kemesraan dan semangat keluarga Duta Bahasa. Terima kasih saya ucapkan kepada Duta Bahasa Cik Aidli Mosbit yang mengendalikan persembahan Majlis Pelancaran hari ini, dan juga kepada Duta-duta Bahasa yang bersatu untuk menjadi contoh kepada orang ramai dalam menggalakkan penggunaan bahasa Melayu. Usaha ini melengkapkan usaha daripada rakan-rakan kerjasama kami dan MAEC, dalam memberi inspirasi kepada lebih golongan muda yang berbakat, supaya mereka ke depan untuk meneruskan perjuangan bahasa kita.

14. Bagi pihak Majlis Bahasa Melayu Singapura, saya ingin mengucapkan tahniah kepada Cik Nurfarhana M Noor, Encik Bakti Khair dan Encik Shahrizal Salleh yang akan dilantik sebagai Duta Bahasa hari ini. Selamat datang ke keluarga Duta Bahasa!

15. Hadirin, anda semua sudahpun menerima senaskhah Jurnal Sekata yang dilancarkan semula oleh Majlis Bahasa Melayu Singapura, baru-baru ini. Terbitan pertama Jurnal Sekata adalah pada tahun 1980an dan edisi tahun ini diterbitkan sempena sambutan Bulan Bahasa. Penerbitan jurnal ini menggambarkan satu lagi usaha pembangunan bahasa dan kesusasteraan di Singapura. Setinggi-tinggi penghargaan diucapkan kepada semua penyumbang dan editor-editor edisi Jurnal Sekata tahun ini – Cikgu Suratman Markasan, Encik Mohd Raman Daud, Encik Jamal Ismail dan Cik Noridah Kamari dan Encik Juffri Supa'at. Semoga masyarakat kita, terutamanya para pelajar, dapat meraih manfaat daripada membaca jurnal yang kaya dengan ilmu ini.



16. Saya juga bersyukur kepada pemenang-pemenang Anugerah Guru Arif Budiman yang telah menyumbang isi kandung buku nota yang dicetak sempena Bulan Bahasa tahun ini.
17. Bulan Bahasa juga amat bertuah kerana adanya sokongan daripada rakan-rakan masyarakat seperti MESRA dan Persatuan Rakyat (PA). Jumlah MAEC yang mengambil bahagian dalam acara-acara Bulan Bahasa tahun ini berlipat dua kali ganda dan ini sangat memberangsangkan. Saya berharap usaha sebegini akan diteruskan, agar bahasa dan budaya Melayu sentiasa diraikan dan dilestarikan.
18. Kami juga bersyukur atas sokongan daripada rakan-rakan kerjasama yang lain. Tanpa sokongan mereka, sambutan Bulan Bahasa tidak akan terlaksana. Setinggi-tinggi penghargaan buat Jawatankuasa Pembelajaran dan Penggalakan Penggunaan Bahasa Melayu (MLLPC), Dana Kedwibahasaan Lee Kuan Yew dan Jawatankuasa Penterjemahan Nasional atas sokongan mereka terhadap rakan-rakan kerjasama Bulan Bahasa. Sekalung budi juga diucapkan kepada Lee Foundation, Shaw Foundation, Dana Pemandanan Kebudayaan, Majlis Ugama Islam Singapura (MUIS), Lembaga Tote Singapura, Kwan Im Thong Hood Cho Temple, SBS Transit dan Second Chance atas sokongan mereka terhadap sambutan Bulan Bahasa dan program-program kami.
19. Saya juga ingin mengucapkan penghargaan saya kepada Lembaga Perpustakaan Negara (NLB), Taman Warisan Melayu dan Wisma Geylang Serai



kerana telah menyediakan tempat dan kemudahan bagi rakan-rakan kerjasama untuk menganjurkan acara dan aktiviti mereka.

20. Tidak lupa juga kepada penyokong-penyokong kami yang lain, MDIS, Auric Pacific and Sunshine Bakeries, Teevers, Hajah Maimunah, Rumah Makan Minang, F&N dan King's Potong Ice-Cream yang telah menyokong kami tahun ini. Daripada pihak Jawatankuasa Bulan Bahasa dan Majlis Bahasa, saya mengucapkan ribuan terima kasih, dan kami mengharapkan sokongan berterusan anda.

21. Ekosistem rakan kerjasama, para pendidik, sekolah-sekolah, pertubuhan masyarakat inilah yang menyokong perkembangan Bulan Bahasa sehingga hari ini. Tahun ini, kalendar acara Bulan Bahasa menampilkan 94 program oleh 51 rakan kerjasama.

22. Persiapan sambutan Bulan Bahasa 2018 adalah sebuah usaha sama Jawatankuasa Bulan Bahasa. Sekalung budi saya ucapkan kepada semua ahli jawatankuasa yang telah meluangkan masa dan tenaga untuk memeriahkan lagi sambutan Bulan Bahasa yang istimewa tahun ini. Izinkan saya menjemput semua ahli jawatankuasa untuk berdiri, agar kami dapat mengiktiraf dan menghargai peranan anda dalam menjayakan sambutan Bulan Bahasa.

23. Kami juga disokong oleh Lembaga Warisan Negara (NHB), sekretariat kepada Majlis Bahasa Melayu Singapura dan Jawatankuasa Bulan Bahasa. Untuk



semua perancangan dan kerja keras anda dalam menjayakan sambutan Bulan Bahasa tahun ini, terima kasih.

24. Perhimpunan kita hari ini di Wisma Geylang Serai, sebuah sebuah pusat penting di mana masyarakat Melayu berinteraksi dan menjalinkan persaudaraan, menunjukkan keinginan masyarakat kita untuk melestarikan bahasa, budaya dan warisan Melayu untuk anak-anak kita. Usaha kita mesti berterusan, dan tanggungjawab kita terhadap generasi seterusnya harus dikongsi bersama.

25. Bulan Bahasa akan terus memberikan fokus pada Ilmu, Budaya dan Mesra, dalam usaha kita untuk melestarikan penggunaan bahasa Melayu. Kembalinya sambutan tahun ini ke kawasan Geylang Serai menandakan pentingnya hubungan warisan dan nilai-nilai kemasyarakatan.

26. Bahasa Melayu bahasa kebangsaan dalam masyarakat majmuk Singapura. Penggunaan dan penghargaan budaya dan bahasa Melayu bergantung pada kita.

27. Masih lagi terdapat potensi dalam masyarakat kita untuk menguatkan sokongan terhadap bahasa Melayu. Saya dan Jawatankuasa Bulan Bahasa juga ingin mencari peluang-peluang baharu dengan rakan-rakan kerjasama di luar sambutan Bulan Bahasa.

28. Pada masa yang sama, dalam mengembangkan jangkauan Bulan Bahasa pada tahun-tahun yang akan datang, kami ingin bekerjasama dengan kumpulan-



kumpulan baharu. Kerjasama baharu bersama kumpulan-kumpulan, seperti Main Tulis Group, tahun ini memberi satu keyakinan bahawa usaha mengembangkan bahasa Melayu akan berterusan.

29. Usaha kami bersama, oleh rakan-rakan kerjasama dan Duta Bahasa, telah membuktikan komitmen dan sokongan kami terhadap pelestarian bahasa Melayu. Bagaimana pula dengan anda?

30. Semoga bahasa dan budaya Melayu sentiasa berkembang dalam anyaman kehidupan masyarakat kita, dan semoga generasi muda kita terus menggunakan bahasa Melayu agar bahasa kita kekal.

31. Jika libur hari Selasa,
Mari daki bukit bendera;
Tiga dekad Bulan Bahasa,
Ayuh rai satu Negara.

Bahasa Kita. Gunakanlah.

Terima kasih.